

I. DISPOSICIÓN XERAIS

XEFATURA DO ESTADO

- 3030** *Real decreto lei 3/2015, do 22 de marzo, polo que se prevé unha oferta de emprego público extraordinaria e adicional para loitar contra a fraude nos servizos públicos, para o impulso do funcionamento da Administración de xustiza e en aplicación das medidas previstas na Lei 27/2013, do 27 de decembro, de racionalización e sustentabilidade da Administración local.*

I

Os resultados que nos últimos tempos conteñen os distintos indicadores económicos permiten afirmar que a estabilidade orzamentaria e a sustentabilidade financeira non son só dous piares nos cales se basea a actuación económica e orzamentaria das administracións públicas, senón que se revelan como dous elementos fundamentais para garantir a redución do déficit público, o crecemento económico e a creación de emprego.

Para poder garantir de maneira adecuada o cumprimento destes principios, que se presentan como inevitables na actuación económico-financeira das administracións públicas, é preciso contar só cunha adecuada planificación e regulación que permitan unha correcta e eficiente asignación dos recursos públicos, o que conduce, desde o punto de vista dos ingresos públicos, á necesidade de dotarse tanto do marco xurídico necesario como dos medios materiais e, sobre todo, persoais, que permitan a correcta e completa aplicación do dito réxime xurídico.

O sistema tributario vixente, en concreto, a recente reforma da Lei do imposto sobre a renda das persoas físicas, avanza de forma decidida nesta liña de garantir a eficiencia na asignación de recursos, o que permite non só garantir a sustentabilidade financeira das administracións públicas, senón tamén estimular o crecemento económico e a creación de emprego, sen descoidar a atención aos colectivos máis desfavorecidos.

Porén, este sistema quedaría incompleto se non contase cos medios necesarios que garantan o seu correcto cumprimento, é dicir, de nada serviría o modelo máis completo e ecuánime.

A loita contra a elusión e a fraude, tanto no ámbito tributario como no ámbito das cotizacións sociais, só se pode librar de maneira adecuada se se conta cos medios persoais adecuados.

Neste sentido, e debido ás restricións orzamentarias habidas nos últimos tempos, os recursos humanos que se incorporaron ao servizo da Administración destinados á loita contra a fraude nas súas distintas vertentes resultan insuficientes para levar a cabo as distintas actuacións de control e inspección que serían necesarias, polo que se presenta como imperativa a necesidade de incorporar novos medios persoais que redobren os esforzos que son necesarios neste sentido.

A redución da fraude fiscal supón aumentar os ingresos públicos aos cales as administracións públicas deben poder acceder para poder satisfacer os intereses xerais; pero esta é tamén un elemento esencial para permitir a redución da presión fiscal e, xa que logo, o crecemento económico e a creación de emprego, como xa se indicou.

Todo isto xustificaría a incorporación de novas prazas ás xa previstas na oferta de emprego público para os corpos de inspección e loita contra a fraude fiscal e social, mediante a modificación da taxa de reposición establecida pola Lei de orzamentos xerais do Estado para 2015.

II

Ben que a loita contra a fraude fiscal, na medida en que resulta esencial para garantir a estabilidade orzamentaria e a sustentabilidade financeira, por si soa supón xa un

elemento que permitiría a adopción de medidas de carácter urxente e extraordinario, é necesario ter en conta que o cumprimento destes principios non só se garante cunha correcta asignación de recursos públicos, senón que tamén é preciso loitar contra aquelas actuacións que nos diversos ámbitos do público poidan interferir no cumprimento deses principios ou na consecución da redución do déficit público, o que exige reforzar os medios persoais destinados ao control naqueles ámbitos máis carentes deles.

Neste caso, e para a consecución destes obxectivos, cómpre reforzar de maneira inmediata os medios persoais destinados ás funcións de control e fiscalización interna da xestión económico-financeira e orzamentaria, a contabilidade, tesouraría e recadación, e o asesoramento legal, funcións públicas necesarias en todas as corporacións locais, cuxa responsabilidade administrativa está reservada a funcionarios da Administración local con habilitación de carácter nacional, para dar resposta así ás exigencias de ordenación e racionalización da Lei 27/2013, do 27 de decembro, de racionalización e sustentabilidade da Administración local, e ao incremento do contido das funcións de control económico no marco da normativa de estabilidade orzamentaria e sustentabilidade financeira.

III

Un dos parámetros que se recolle á hora de valorar a economía dun país e, por tanto, a realización de investimentos nel é a seguridade xurídica que este ofrece, tanto en termos de calidade e publicidade das normas, como en canto á estabilidade e garantía do seu cumprimento.

Neste caso, a garantía última do cumprimento do dereito corresponde aos órganos xudiciais, cuxa máxima expresión son os xuíces e tribunais. Non obstante, e sen prexuízo do relevante papel que constitucional e legalmente corresponde a aqueles, cómpre destacar que as últimas reformas procesuais operadas incorporaron novas competencias a favor dos secretarios de Xustiza, esenciais para o correcto impulso dos procesos xudiciais que instan os cidadáns e as empresas.

É preciso reducir os prazos de tramitación dos procesos, o que redundará, sen dúbida, nunha xustiza de maior calidade que ten o seu reflexo no ámbito económico, mediante a atracción de novos investimentos no noso país, o que supón un claro aliciente para o crecemento económico e a creación de emprego.

Por isto, non cabe demorar a posta en marcha de medidas destinadas á consecución deste fin, entre as cales destacaría a incorporación de novos secretarios xudiciais, que son os responsables da oficina xudicial e, por tanto, de garantir a eficacia e eficiencia na resolución dos asuntos xudiciais.

IV

Como sinalou en diversas ocasións o Tribunal Constitucional, corresponde ao Goberno apreciar cal é o momento ou a conxuntura económica máis apropiada para adoptar medidas de política económica xeral, que se poden adoptar, cando así sexa preciso, mediante a aprobación de disposicións legislativas provisionais e de eficacia inmediata como as contidas nun real decreto lei.

Todos os argumentos expostos xustifican de maneira adecuada e suficiente a urxente e extraordinaria necesidade da adopción do presente real decreto lei.

Na súa virtude, en uso da autorización contida no artigo 86 da Constitución española, por proposta do ministro de Facenda e Administracións Públicas, logo de deliberación do Consello de Ministros na súa reunión do día 20 de marzo de 2015,

DISPONGO:

Artigo 1. *Oferta complementaria na escala de funcionarios de Administración local con habilitación de carácter nacional.*

No ano 2015 autorízase, adicionalmente ao número de prazas asignadas na distribución da taxa de reposición prevista no artigo 21 da Lei 36/2014, do 26 de decembro, de orzamentos xerais do Estado para o ano 2015, a convocatoria de até 200 prazas na escala de funcionarios de Administración local con habilitación de carácter nacional, co fin de dar cumprimento ás previsións establecidas na Lei 27/2013, do 27 de decembro, de racionalización e sustentabilidade da Administración local.

Nas convocatorias que se realicen para as prazas que agora se autorizan especificaranse as subescalas que correspondan das previstas no artigo 92 bis da Lei 7/1985, do 2 de abril, reguladora das bases do réxime local.

Artigo 2. *Oferta complementaria no ámbito da loita contra a fraude fiscal e o control do gasto.*

No ano 2015 autorízase, adicionalmente ao número de prazas asignadas na distribución da taxa de reposición prevista no artigo 21 da Lei 36/2014, do 26 de decembro, de orzamentos xerais do Estado para o ano 2015, a convocatoria de 294 prazas no ámbito da loita contra a fraude fiscal e o control do gasto, das cales 30 prazas serán no corpo superior de inspectores de Facenda do Estado; 10 prazas, no corpo superior de interventores e auditores do Estado; 194 prazas, no corpo técnico de Facenda; 30 prazas, no corpo técnico de Auditoría e Contabilidade, e 30 prazas, no corpo xeral administrativo da Administración do Estado, especialidade de axentes da Facenda Pública, mediante o sistema de incorporación de novo persoal para desempeñar as súas funcións no Ministerio de Facenda e Administracións Públicas e na Axencia Estatal de Administración Tributaria.

Artigo 3. *Oferta complementaria no ámbito da loita contra a fraude laboral e da Seguridade Social.*

No ano 2015 autorízase, adicionalmente ao número de prazas asignadas na distribución da taxa de reposición prevista no artigo 21 da Lei 36/2014, do 26 de decembro, de orzamentos xerais do Estado para o ano 2015, a convocatoria de 150 prazas no ámbito da loita contra a fraude laboral e da Seguridade Social, das cales 19 prazas serán no corpo superior de inspectores de Traballo e da Seguridade Social; 13 prazas, no corpo superior de interventores e auditores da Administración da Seguridade Social; 5 prazas, no corpo superior de letrados da Administración da Seguridade Social; 25 prazas, no corpo superior de técnicos da Administración da Seguridade Social; 43 prazas, no corpo de subinspectores de Emprego e da Seguridade Social; 27 prazas, no corpo de xestión da Administración da Seguridade Social, e 18 prazas, no corpo de xestión da Administración da Seguridade Social, especialidade de auditoría e contabilidade, mediante o sistema de incorporación de novo persoal para desempeñar as súas funcións no Ministerio de Emprego e Seguridade Social e nas entidades xestoras da Seguridade Social.

Artigo 4. *Oferta complementaria no ámbito da Administración de xustiza.*

No ano 2015 autorízase, adicionalmente ás previsións da Lei 36/2014, do 26 de decembro, de orzamentos xerais do Estado para o ano 2015, a convocatoria de 160 prazas no corpo de secretarios xudiciais para desempeñar as súas funcións no ámbito dos órganos xurisdiccionais que integran a Administración de xustiza.

De conformidade co establecido na Lei orgánica 6/1985, do 1 de xuño, do poder xudicial, o cincuenta por cento das prazas que se autorizan resérvanse para a súa provisión polo sistema de promoción interna nos termos previstos no número 2 do

artigo 442 da indicada norma, e as que non se cubran por este procedemento incrementarán a convocatoria de quenda libre, co límite máximo das prazas que se autorizan no punto anterior.

Artigo 5. *Cota de persoas con discapacidade.*

As convocatorias de probas selectivas que deriven do establecido nos artigos 1, 2 e 3 deste real decreto lei reservarán unha cota non inferior ao sete por cento do total das prazas convocadas para a súa cobertura entre persoas con discapacidade.

As convocatorias de probas selectivas que se realicen de acordo co indicado no artigo 4 deste real decreto lei reservarán unha cota non inferior ao cinco por cento do total de prazas incluídas no citado artigo para a súa cobertura entre persoas con discapacidade, de acordo co establecido na Lei orgánica 6/1985, do 1 de xuño, do poder xudicial.

Disposición derradeira única. *Entrada en vigor.*

Este real decreto lei entrará en vigor o día seguinte ao da súa publicación no «Boletín Oficial del Estado».

Dado en Madrid o 22 de marzo de 2015.

FELIPE R.

O presidente do Goberno,
MARIANO RAJOY BREY